

照上帝歡喜 ê 去做

有六項是上主所怨恨，連祂 ê 心所討厭 ê 有七項；就是驕傲 ê 目矚，講白賊 ê 舌，劊無罪 ê 人 ê 手，圖謀 pháiⁿ 事 ê 心，奔走去陷害人 ê 腳， ...

(《全民台語聖經》箴言 6：16-18)

請注意，以上所列 ê 頭五項「可惡 ê t̄i-chì 是 kah 人類 ê 身軀有關係：目、舌、手、心 kah 腳。當上帝 hō 咱活命 kah 生物機制 thang 來看、講、thèh、想 kah 徙動 ê 時，祂並無 hō 咱完全 ê 道德自由，thang 用咱所選擇 ê 任何方式來使用。上帝非常明確 teh 限制咱 ê 行為。

類似 ê 情形，當咱買物件 ê 時，咱 mā hō 咱家己受 tiòh 某種 ê 限制。若是咱開真 chē 錢去買一塊工藝專家手工刺繡 ê 幼路桌巾—有可能是一個 cha-bó 人做兩年 chiah 完成 ê—咱 bē kā 它帶 tng 來厝裡，用它來拭地板；á 是咱若買一台新汽車，咱 mā bē kā tām ê 糞埽 (pùn-sò) 倒 tī 後座，kā 它 chhia 去糞埽場。M̄-koh，當上帝 hō 咱一個奇異，無受污染 ê 身軀 ê 時，咱 beh án 怎來處理 chit-ê 比精美 ê 桌巾，á 是新車 koh khah 寶貴 ê 所有物 neh？有時咱會用咱 ê 身軀來做上帝輕視 ê 傷害人 ê t̄i-chì。

上帝 ê 命令 kah 耶穌基督 ê 標準永遠 bē 改變。不管社會接受啥物，不管咱 tī 電影 á 是電視看 tiòh 啥物 t̄i-chì 發生，不管咱厝邊有接納啥物做 in ê 慣例，á 是咱 ê 朋友決定 beh 接受啥物 t̄i-chì，身為基督徒，咱 tiòh 堅持遵行上帝為咱設定 ê 道路。咱必須做一個

決定來接納上帝 ê 律法做咱 ê 律法，用 hō 上帝歡喜 ê 方式來使用咱 ê 身軀 kah 心志，而且 m̄-thang 違背基督 ê 標準。

祈禱：上帝 ah，我 o-ló 祢，因為祢 hō 我奇妙 ê 禮物。我驚嘆，因為祢疼我，koh kan-taⁿ ài beh hō 我 siōng 好 ê 物件，甚至雖然有時我 bē-tàng 明白，啥物 chiah 是對我真正有好處 ê。求祢 hō 我有智慧 kah 氣力，tī 我生活 ê tàk 方面來實現祢 ê 旨意，m̄-nā thang 賜福我家己，mā 賜福我身邊 ê 人。我祈禱是奉基督 ê 名。阿們。

(2002.08.11)